

DIALUNA 30 DECEMBER 1991

Segun AVP:

MINISTRO PRESIDENTE
A PERDE TUR SINTI
PA NOS HENDENAN

NELSON TROMP - REY DI DANDE



Diadomingo madrugada alrededor di 3:45 p.m. e Rey di Dande pa 1991/1992 a bira conocido. E biaha aki ta e cantante Nelson Tromp a bay cu e bunita corona, cual a ser entrega pa e organizador di e Festival, Harry Croes, y e bunita trofeo a ser entrega pa Ministro Fredis Refunjol. Nelson ta yiu homber di Vicente Tromp, y a canta su dandé cu e grupo di Lirios del Campo. Pabien na e Rey, y riba pagina 16 y 17 por mira mas.

KEHO NA MONTON DI SORTEO LOTTO

ORANJESTAD (AAN): Un multitud di hende a aglomera ayeranochi riba Plaza Betico Croes pa asina mira e gran sorteo di Lotto di 1991, cual a priminti 21 ganador e bunita suma di 85 mil Florin.

Algo cu realmente a pone un nubia scur riba e anochi aki, tabata cu mayoria di hende na Aruba no a spera cu ta djis "cuatro cifra" nan ta bay saca pa defini e 21 ganadornan.

Hopi ta esnan cu a kere cu ta 21 biaha nan lo saca cuatro cifra, pa asina saca e diferente ganadornan.

E hecho cu Fundacion Lotto pa Deporte a garantiza 21 ganador di lo gana e suma di Afl. 85.000,00 ta indica cu calculonan a ser haci riba computer pa imprimi di cada combinacion di number, e cifra aki riba 21 diferente ticket.

Pero e hecho aki a resulta di no ta mucho conoci cerca pueblo. "Tabata falta di informacion, ya cu nos a kere cu ta 21 biaha lo saca un cifra," un lector a reclama na DIARIO instantenan despues cu e cifra di 2 - 3 - 18 - 30 a ser saca.

E cantidad di yamadanan cu a drenta ayeranochi na Redaccion di DIARIO so ta demostra cu pueblo no ta keda mucho contento. Algun di nan tabata hasta rabia y emocion, y tabata saca palabranan di insulto den direccion di Lotto pa Deporte.

Loke a resalta ta e hecho cu hopi di nan no tabata sa di e forma di proceder aki, y pesey a cumenza bisa cu ta trata aki di fraude.

Un lector a indica cu ta imposible cu tin 21 persona ta cana rond cu e mesun ticket, pasobra e mes cu ta bende esakinan no a mira dos ticket cu e mesun number.

El a relata cu nan ta un grupo di damas, kendenan a keda warda te laat di anochi pa e resultado, y awor a keda decepciona pasobra ta un number so a saca pa defini e 21 ganadornan, y pa colmo ta un solo persona so a subi e escenario pa bisa cu el a gana. Nan ta lamenta si cu nan no a muestra su ticket riba e camera pa asina mira cu enberdad e ta un ganadora. "Loke a pasa awenochi ta

algo inolvidable, y bergonzoso pa Aruba," el a bisa. "Nunca mas mi lo bay compra Lotto di Aruba".

Un otro lector, kende a suplica DIARIO pa publica su nomber como Richard Kock di Paraguystraat 4, a indica cu "Ningun hende den un solo tiro por gana. Esaki mi ta considera como fraude". E lector aki a indica cu el a hinca e formula den su computer, y segun el e por sali solamente seis biaha.

El a indica cu e no por kere cu di cada cifra cu a ser bendi na Aruba, lo tin 21 ticket igual den man di hende. El a puntra: "Pakico si nan kier haci pueblo feliz, nan no a rafi mas number? E ora tur hende sa cu tin 21 ganador sigur," el a bisa.

Kock a indica finalmente cu e tin un conseho pa pueblo: "Mi ta conseha pueblo pa no cumpra ningun ticket scratch mas di Lotto pa Deporte den nan bida, si acaso no bini un splicacion di e sorteo aki."

Cosnan na Aruba berdaderamente ta bayendo malo," lector Kock a bisa. E tambe ta di acuerdo cu Lotto pa Deporte no a duna mucho splicacion en detayes con e sorteo lo worde ehecuta.

Un otro lector a indica cu el a prepara un papel basta largo pa bay sinta skirbi e 21 combinacion di cuatro numbernan cu nan lo bay saca. Finalmente el a haya sorpresa cu ta djis un combinacion se a saca.

"/nto merdia mes mi a
tende in funcionario di Go-
bierno duna un entrevist na
un radio-emisora local,
bisando cu lo bay tin 21 ga-
nador di 85 mil florin. Pero
ningun momento el a bisa cu
ta un solo combinacion di ci-
fra... lo bay saca," el a in-
dica.

Un lector di Savaneta a indica cu tanten e no mira potret di e 21 ganadornan, e lo keda cu e creencia cu aña 1991 ta cera cu e "Fraude di mas grandi di Caribe", envez di e "Sorteo di mas grandi di Caribe".

En total como seis personas ayer a nochi a declara na DIARIO cu nan lo no cumpra Lotto mas.